



行在陽秋上

隆武丙戌二年冬十月十四日戌丙永明王監國肇慶以明年為

永曆元年

御諱由榔 神宗孫也 皇考桂端王生四子長由次由

俱為獻賊所害三由 封安仁王以病薨四永明即王

上也天資聰明仁厚 皇考自衡徙梧以病薨上居苦次會

隆武蒙塵報至兩廣總督丁魁楚廣西巡撫瞿式耜等謂天

下不可一日無君乃迎桂嗣王至肇慶立之以府署為行在

頒詔楚滇黔蜀

閣輔蘇觀生自南雄撤兵還廣州閣臣何吾騶自閩遁歸青山  
加丁魁楚東閣大學士兵部尚書瞿式耜東閣大學士吏部尚  
書

魁楚原任兩廣總督兵部尚書右副都御史兼吏部右侍郎  
賜劄劍進平粵候令以吏部右侍郎入閣攝尚書事兼戎政  
式耜原任廣西巡撫兵部右侍郎今以禮部尚書入閣兼兵  
部尚書掌銓事

封李明忠武靖伯鎮南詔

以許德生為潯州推官監明忠軍 明忠江西人狼兵帥也

初奉隆武詔協勦江西八月率潯州兵六千至肇慶九月至  
三水聞隆武汀州之變返肇慶預推戴

原任兵部尚書東閣大學士呂大器自閩赴行在  
仍用原官辦事旋以病致仕

原任兵部尚書守制李永茂赴行在  
上隆武帝尊號曰思文皇帝后曰思文皇后

擢原任福建布政吳炳為戶部尚書

督師兵部尚書右副都御史何騰蛟等公疏勸進

隆武朝騰蛟進定興侯賜劍駐軍長沙楚撫兵部右侍郎右

副都史御堵胤錫受隆武命督雲貴師會聞汀變騰蛟胤錫  
公疏達行在

補馬吉翔郭承吳嚴雲從吳繼嗣等為錦衣衛使

吉翔北直人繼嗣涿鹿人崇禎十六年獻賊陷衡州 皇考

皇兄及 上偕宮嬪自永州奔粵西行李蕭然過道州州人

不納及羈縻行駕以索賂及賊入城賴繼嗣夫婦以肩輿衛

上及國母于難 上失金冊繼嗣亦失所佩州印賊踞城

四十餘日無兵衛繼嗣密約粵西鎮楊國威引兵復城國威

過道州覓得州印繼嗣亦獲金冊獻之

進武崗伯劉承胤武定侯鎮寶慶

以王坤為司禮監秉筆太監

坤故北關自閩來奔

十一月癸卯朔日有食之

進何騰蛟武英殿大學士加太子太保

得贛州敗報司禮太監王坤請駕移蹕梧州大學士瞿式耜諫  
止之

唐王自立于廣東改元紹武以蘇觀生為大學士

觀生過三水不赴肇慶而行在諸臣以觀生無推戴意拒之

適唐王與淮王航海而至觀生遂奉唐王監國

遣兵科給事中彭耀入廣州諭唐王去帝號不從耀遇害

故大學士陳子壯廣州人移書瞿式耜請興師東向以靖唐

藩式耜以聞上曰先遣官諭之俟其拒命討之未晚也蘇

觀生既殺耀曰集兵向肇慶而清兵因得乘間窺潮惠矣兵

科給事中陳邦彥同耀受命入廣州聞耀死乃還

以林佳鼎為總督兵部侍郎勦唐藩

十八日庚申上即皇帝位于肇慶追尊皇考桂端王為興

宗皇帝追母王太妃為皇太后立妃王氏為皇后大赦天下進

瞿式耜文淵閣大學士以朱容藩掌宗人府事

遣錦衣衛嚴雲從護送三宮居桂林敕靖江王防守

授陳子壯中極殿大學士兵部尚書節制兩廣江西福建湖廣

軍務賜尚方劍便宜行事

二十日壬戌清李成棟入潮州遂入惠州

進蕭琦兵部尚書晏日曙工部尚書周光夏都御史李用楫等

為各道御史

補原任少詹魚侍讀朱天麟翰林院學士

二十九日總督林佳鼎捷于三水

唐王遣督師陳泰歐陽等軍于三水城西將犯行在武靖伯李明忠自韶州入援戰于三水大捷俘斬八百餘級陳泰遁去

十二月初三日提督林佳鼎兵潰于海口監軍夏四敷赴水死佳鼎不知所在或曰與四敷同赴水死三水之捷佳鼎有驕色督兵晝夜兼行唐王兵偽降誘其水師至海口適東南風大作唐王兵以火攻之佳鼎等盡登岸列營泥淖深三尺餘人馬盡陷兵大潰李明忠二三十騎奪路去許德生被獲至廣州繫獄明忠尋降于清後復返正

特授王化澄兵部右侍郎兼都御史提督粵師周鼎瀚兵科給事中

化澄原任以御史巡粵加大理卿鼎瀚原任戶部郎中上以林佳鼎失事也化澄鼎瀚皆以內批用瞿耜奏內批用人非興朝舉動上不允

進原任兵部尚書李永茂東閣大學知經筵永茂以守制不入直專知經筵永茂疏薦鄉望十五人御史劉湘客與焉太監王坤啓視不悅于十四悉塗抹其名湘客被黜永茂拂以去爭之瞿式耜奏大臣論薦固其職司禮

輒去取其間何以服御史何以安大臣坤復疏薦海內名卿數十人式耜曰司禮抑人固不可薦人更不可後湘客改官編修充經筵講官

加王化澄兵部尚書

旨杖御史童琳奪科臣劉鼎等職大學士瞿式耜疏寢之

琳劾都御周光夏私亂臺規 旨下廷杖式耜曰新政未布何可杖言官 上從之鼎等以劾司監王坤落職賴式耜疏救得賜環

中允方以智棄官去

王坤疑劉鼎疏出以智手故以智力求去

十五日清陷廣州

清將佟養甲李成棟遣遊擊龐起龍偽為援兵求入城城內信之遂蜂擁而入內兵登城戰一晝夜擒斬清遊擊王士選清兵欲退會有內應遂陷唐王被獲自盡周益諸王俱遇害蘇觀生自縊死許德生降于北紹武守臣忠惠伯王之臣大學何吾騶及顧元鏡洪天擢潘曾瑋李綺曹燁耿獻忠毛毓祥等俱降其在籍剃髮降者為李覺斯王應華梁應材伍瑞隆等又葉廷祚曾道唯陳世傑關捷先等俱降

清狗東筦新會等縣

二十五日行在得廣州陷報 上乘輿出城駕小舟如西峽傳

幸梧州大學士瞿式耜從駕而西丁魁楚走岑溪王化澄走潯  
州

清兵薄廣城且急式耜方典選請視師督戰駐峽口王坤復  
趣 上西避之式耜夜乘小舟留駕曰我兵水陸鳧至三水  
可上下搯也爭之不得請身留肇慶宗人府朱容藩奏曰左  
右所恃惟式耜一人式耜留守則 上行益孤 上舟西式  
耜部署五日疾趨梧 上西行又五日矣魁楚惑于姦弁蘇

聘從梧入岑溪化澄攜中樞印走潯州西上護蹕者惟式耜  
一人兵部尚書李永茂工部尚書晏日曙太僕卿田芳走博  
白

清以降撫曹燁仍巡撫廣西

燁歛縣人 進士

改廉州知州陸世廉于梧州

授熊兆璧兵部主事

兆璧廷弼子也原任容縣知縣旋棄官去

授孫順則辰州分守道



清兵犯湖湘命督師何騰蛟率楚師禦之命大學士瞿式耜轉  
粵西餉濟師

駕至梧州

封三國璽武靖侯王維恭華亭侯

以國戚故也

元年丁亥春正月癸卯朔 駕在梧州

時戶部尚書吳炳翰林學士方以智朱天麟文選司郎中吳  
貞疏給事中唐誠張起御史程源中書舍人吳其雷洪士彰  
錦衣衛馬吉翔等俱從

命魯王總理南北直省錢糧軍馬恢復事文武爵賞俱聽便宜  
行事

封陳邦傅思恩侯焦璉新興伯

駕發梧州

上自梧州北幸桂林閣部瞿式耜從行 上欲府江達桂林  
兵衛寥寥梧州知府陸世廉惟募舟夫以進式耜扈駕西行  
夜泊昭平 板灘

原任右魚都御史巡撫廣信張家玉起兵東莞兵部職方司主  
事陳邦彥起兵復順德縣

丁未日食

山東鄉兵攻莒州

十六日李成棟陷肇慶

駕幸桂林

兵部主事陳邦彥招降日行灘余龍等水師焚清艘百餘于東莞直抵廣州境李成棟返救故乘輿得達桂林

劉湘客曰 上于正月幸桂林式耜肅堂陞敕守禦誕告楚蜀各路征鎮粵西居山川上游清不能仰面攻明矣兵士雲屯湖南北立需戰粵南大通滇柳慶出黔左右兩江四十五

洞土狼悍勇警國家惠威三百年撫粵悉受銜縻足支內侵桂城爲明辟都䟽請道里之可達行在者

加瞿式耜太子太保駐梧江

廿三日虜陷高雷廉三州

東莞張家玉聚衆入海

潮惠二州林舉賢陳耀起兵衆至萬人

二十九日虜陷梧州

潯州守將李明忠平樂守將李承忠俱以兵降北

承忠或作承志

叛將杜永和犯岑溪平粵公丁魁楚督戰墮水死

魁楚有兵千餘屯岑溪李成棟遣副將杜永和招之不至永和  
和水陸兼進魁楚與戰于藤江中矢走死

二月壬申朔潮州賴天肖起兵叛將文貴陳虎余成隆來戰擊  
敗斬之

韶州陳順簡信起兵惠州蘇來起兵新會鄉紳黃奇策起兵  
清遣沙遠勉撤奇聖來招撫奇策斬之

進吳炳方以智東閣大學士同入直  
以智旋罷去

以原任吏部侍郎王錫袞禮部尚書文安之為東閣大學士  
以周堪賡郭都賢劉遠生等為各部尚書以毛壽登吳德操等  
為御史丁時魁禮科給事金堡禮科都給事中兼職方員外  
補萬六吉為給事中蔡之俊翰林簡討

初八日己卯海師攻福州叛將張應夢出戰海師遁  
鄭彩周崔芝合兵攻漳平不克搃兵陳國祚力戰死之  
十一日壬午月掩歲星于東井

孫守法屯兵長安石鰲谷

陳邦彥師次高平

邦彥遣馬應房以舟次攻順德

鄭彩克漳浦擒斬虜官計國男

海師攻興化叛將張應元逆戰而走

晉劉承胤安國公曹志建永國公焦璉新興侯郝永忠南安侯

盧鼎宜章伯

十五日丙戌駕幸全州敕新興侯守桂林

上幸桂林復謀移蹕大學士瞿式耜力爭弗聽竟出全陽

廿二日癸巳海師次福清不克

圍城三日叛將陳心裕兵出北門遂走

二十四日乙未林舉賢陳耀政廣州不克陣斬清將劉朝用周  
一鳳而去

丙申清陷長沙

知縣王宸縣丞楊日新降

丁酉清陷湘陰

王進才大掠湘陰而遁清兵遂入城縣丞扶雲鳳迎降

督師何騰蛟師次衡上

騰蛟檄張光壁黃朝宣等援長沙俱不至朝宣走衡州

是月安國公劉承胤朝行在

詔幸永州

駕至全州楚將劉承胤欲擁入桂林 太后不允遂幸永州

三月壬寅朔犁虜伯孫守法復寧州

大學士瞿式耜自梧州還桂林

時警報狎至 上念式耜元臣諭趣治裝從行式耜謝曰君

以仁臣以義臣奉守此土得與此地共存亡于是從官皆行

式耜獨守

甲辰李成棟再陷順德敗余龍于黃蓮焚舟數百馬應房戰死

丁未賴熊攻復建陽

清兵逼梧州陳邦傳棄平樂走

敕大學士瞿式耜留守桂林賜尚方劍節制諸軍

王坤趣 上幸楚式耜泣諫不能挽無已請身留桂故有是

命式耜仍疏請 上暫蹕全州以扼楚粵之中內外兼顧

戊申瀏陽伯董英降于清

自瀏陽出降

壬子清以耿藩伯為廣西巡撫

乙卯清兵薄桂林攻文昌門守將焦璉禦却之

初平樂不守清兵直上至是乘虛數十騎衝文入昌門城中

大驚式耜急呼璉出璉自全州歸休息未定從數人披弦擬  
刃與清兵遇清兵上城樓式耜署在樓下亟緘之璉矢無虛  
發應弦而斃者半餘者走璉短兵接追殺數人且盡清隊遂  
不敢近城城中始定是時清兵自東上昭澤省會逃奔虛無  
人跡 上在全州念首輔且馳驛召還而留守堅誓與清兵  
角拒尤急時清兵衝陴而式耜出守文昌門調度自如也是  
時督師何騰蛟治兵衡湘老将重兵悉屯湖南北聲援弗及  
式耜獨毅然誓衆嬰城而守親帥大將焦璉掩其不備砲矢  
夾發虜鋒大挫

安國公劉承胤遣兵援桂林

虜陷陽朔遍野難鬚式耜與璉危城孤守疏請徵承胤兵承  
胤初從武崗入護猶尊朝廷遂司禮監王坤弄權面叱周鼎  
瀚為奉庵寺鼻息故推重式耜發兵數千援桂

襍錄云北來高副將入桂林掠瞿留守資裝為總兵陳邦傳  
焦璉所殺邦傳遂出兵破貴縣入潯州明忠走邦傳破興業  
劉鴻烈圍鬱林焦璉據桂林破陽朔

戊午張家玉克東甯

己未周崔芝攻閩安

兵部尚書詹兆恒攻開化叛將李榮逆戰兆恒兵敗死之  
壬戌張家玉克新安

家玉至新安西鄉與陳邦策屯兵白石

癸亥督師何騰蛟破清兵與辰州

一作唐申

甲子林質破德化

乙丑林質破建陽叛將蔡應科以兵逆戰質戰敗被執死之

監軍陳邦彥復清遠不守

夏四月壬申朔清撫耿藩伯兵入梧州

耿至梧州攻取陽朔而西失藤縣北敗于桂林不敢進前

江西大旱

詔進張家玉兵部尚書提督嶺東軍務聯絡漳湖兼副都御史

癸酉清陷衡山總兵陳四明降北

乙亥清陷衡山瓊州

叛將閻可義陷之

封錦衣衛郭承昊馬吉翔嚴雲從為伯革御史毛壽登等職劉承胤挾上如武崗

從劉承胤請也御史毛壽登駁之曰金吾無矢石功何得援邊鎮例晉五等爵也吉翔等疑疏出劉湘客手之周鼎瀚遂

造蜚語為董卓催汜之議激承胤逼 上立下廷杖旨縛壽  
登湘客及御史吳德操給事中萬六吉予行在午門外會諸  
臣申救得免壽登等俱落職承胤自桂陽挾 上遷武崗式  
耜疏請留蹕全陽曰聞郊祀禮成即圖移駕不知將回桂林  
耶抑幸武崗辰沅耶夫 皇上原以恢復兩粵為心則不徒  
西粵未恢復未可移駕即東粵未恢復亦當駐全為得策故承胤  
等喉杖壽登等四臣以四臣主還蹕桂林之議也

乙卯清兵入興安州黎虜伯孫守法戰死

李明忠攻潯州

辛巳叛將孔有德沈知祥耿仲明尚可喜兵犯湖廣

孔耿尚俱降清封王是稱三王

癸未清兵入衡州殺黃朝宣父子

甲申白虹貫日

清兵陷永州守將盧鼎走道州

督師何騰蛟駐白牙市兵部侍郎副都御史章曠駐東安

甲申王允成馬進忠走辰沅郝永忠走道州曹志建走永明

癸巳加瞿式耜武英殿大學士少師兼太子太師臨桂伯

以守桂功也式耜疏辭



岑本高等敗沒于浦城

癸巳岑本高王思春江中英江中元張文耀朱國貞劉國球等同攻浦城有原任監軍吳承吳徐元毛文俊張裔元約為內應至是本高等四人敗死國貞被執叛降遂攻供承吳等謀清皆殺之

己亥叛將徐勇破安化遂入新化

王光泰克襄陽擒斬虜官

劉承胤兵掠桂林

承胤兵至桂林挾餉不出與焦璉兵主客不和譁變擊闔掠

市而去

五月辛丑朔清陷新安縣

高雷廉三州俱降于清

壬辰王光泰等克勦陽擒斬虜臣官

庚戌揚州地震

甲戌改武崗為奉天府以周鼎瀚為東閣大學士同劉承胤入直

壬午福建江西大水

壬戌鄭彩破長樂縣

癸亥清陷龍陽縣總兵楊國棟戰死

全家被殺

甲子清陷常德

乙丑清兵攻桂林焦璉擊走之翌日又追敗之

清傾兵變積兩城壞碎薄城環攻文昌門式耜與璉分門嬰守用西洋銃擊中胡騎璉出城戰擊殺數千人自辰抵午不及餐璉曰枵腹奈何式耜括署中米蒸飯分哺士益樂用命向晡未息收兵明日復出戰清衆棄甲杖而奔式耜先令路將馬之驥伏于隔江清衆從栗木嶺遁之驥疾馳渡江運槩

提鞭連斃三人復追殺二十里而還璉久駐桂得桂人心式耜國士遇璉故得其死力

戊辰清陷和平縣知縣李信死之

晉瞿式耜少師兼太子太師臨桂世伯爵

上賜璽書褒嘉式耜疏辭新命復請苦自劾

是月副將周金湯率壯士二百人夜復永州城

金湯莆田人武進士原任永州都司

復均州

六月

督師何騰蛟朝行在 上慰勞之命滇將趙印選胡一清統兵  
數千人從騰蛟歸守白牙教諸鎮扼守寶慶辰永

德 晉何騰蛟四世侯爵駐衡州堵胤錫世伯爵駐長沙章曠駐常

十七日李成棟攻陷新安西鄉陳御策戰死于白石

是月福建張興龍謝志良擁衆入海

廣東英六吉劉良機擁衆入海

海師攻破興國州擒斬程文克

秋七月

初五日督輔陳子壯率舟師攻廣州不克

初十日兵部尚書張家玉克復博羅龍州等縣駐博羅

督輔瞿式耜率宣國公焦璉攻復陽朔平樂

遣司禮監龐天壽催廣西兵援梧州

兵部侍郎兼僉都御史章曠卒于永州

松江人崇禎丁丑進士

陳邦傳復梧州

興陵在梧州督輔式耜奏梧州既復宜昭告 陵寢請 駕

還桂林言甚切至

八月

給督輔瞿式耜新銜誥命

以嚴起恒為東閣大學士

起恒浙人面濶身高有異相原官戶部管錢法試侍郎

二十日清陷高明督輔陳子壯監軍麥而炫被執不屈死之

二十三日 駕發奉天傳幸廣西督輔瞿式耜請繇古泥道雜

容蹕桂林

二十四日清陷奉天劉承胤以兵降清

奉天之陷也守兵先敗遂斫北關棄壺殮而遁

駕三宮無不徒行者中宮嫡妹與王皇親母肩輿出城閣臣

吳炳不及出幾被獲踉蹌走慶遠嚴起恒王化澄吳貞毓馬

吉翔出重賞僱三小舟奉 上宮春西行時乘輿間出不知

所之榮王在辰州督師大學士堵胤錫巡按御史熊 麟等

共議擁戴時隆武閣臣熊開元在保靖司因檄保靖奉開元

書以中興元輔相期開元答書略曰今日所急在討賊不在

立君乘輿所向未卜萬一或有參差魯唐近轍何可再尋

廿六日清陷博羅

九月

李成棟破清遠陳邦彥被獲殺之

廿五日清陷鄖陽王光泰走竹房

清陷沅州巡撫傅上瑞降于清

後清攜上瑞至江西會金聲恒起事疑有變殺之

駕幸沙泥潭

庚申海師破羅源縣又破連江

是月海師掠得山鶯龍門高公島

冬十月戊辰朔 駕幸柳州督師何騰蛟來朝

駕在沙泥潭督師何騰蛟率滇兵來會遂從駕至柳州大學

士嚴起恒亦從萬邨來會

督輔瞿式耜三疏請駕還桂林

時督師何騰蛟嚴起恒及劉湘客咸在桂林南安侯郝永忠  
兵驟至疑主客不相安式耜加禮撫慰永忠信服為之用宜  
章伯盧鼎亦至自楚式耜因疏請蹕極言柳州猺獞雜處地  
瘠民貧不可以駐慶遠壤鄰黔粵南寧地逼交夷不可遠幸  
又言桂林可都云 騰蛟與永忠鼎璉等俱分防汛會

武崗之變 乘輿南粵紆道入苗蠻朝官星散不復存上下  
綱紀式耜西望而泣散布金錢多遣壯士問道迎求乘輿適

報駕抵柳城乃益增發將吏裹餼糧備車馬表請 上幸桂  
林臣躬掃行宮以待于是 上敦諭相國西陲朕根本地先  
生竭力守此待朕駐車使朕不至顛沛異日國家再造先生  
功實多

庚午王光泰奔蜀

辛未太白經天

丁丑兵部尚書張家玉兵敗死

癸未清陷永州攻全州

清師耿仲明佟代陷永州遂遣將王燦董英等 攻 全州

王蔣二鎮失其禦戰黃沙河失利清兵遂渡西河浦督師何  
騰蛟遣總兵何有奇援之

清陷全州岳陽伯王允成總兵唐文曜全州道馬鳴鸞俱降於  
清

清攻辰州榮王遇害

清遣降鎮田起鳳守兵千人守沅州

甲午清兵入興安白土關

十一月戊戌朔

駕幸象州

官軍捷于全州

土司覃裕春子鳴珂與龍文明構兵驚移聖駕次象州式耜再疏迎請與騰蛟起恒籌畫調和主客集永忠璉誓於神刻期出師宜章伯盧鼎與滇鎮趙印選各分路駐全式耜輸餉轉運不絕全州復大捷獲名馬駱駝而還諸帥連營而軍亘三百里清衆退出楚

詔幸南寧

駕自象州欲往南寧忽為焦璉亂兵阻道文武諸臣皆微服而行馬吉翔左右御舟力挽淺水間上見之揮淚乃命閣

臣王化澄吏部尚書吳貞毓間道護三宮往南寧馬吉翔嚴起恒翌上仍遡十八灘還桂林

十二月丁卯朔日有食之

己巳駕幸桂林靖江王亨欽留守輔臣瞿式耜郊迎

上念式耜功高賞薄慰勞備至進見上殿賜坐給贖元經體不治細務以比諸葛武侯裴晉公先是七月司禮監龐天壽奉敕催兵不語久在桂林舊司禮王坤被承胤逐復入自武崗至柳州至象票擬皆金吾吉翔手也式耜勸上攬大權明賞罰威德並行以服遠近

授原任禮部右侍郎郭之奇東閣大學士

在庚寅年駕幸梧州時

督師何騰蛟出師全州

各營兵不和焦璉走平樂郝永忠駐興安

清帥孔有德等攻銅仁思州

有德沈知祥耿仲明尚可喜合兵而攻

以劉遠生為刑部右侍郎丁時魁萬六吉等為給事中是歲錦

江伯楊展據嘉定

二年戎春正月丁酉朔駕在桂林

遣大理寺評事朱宿垣賫詔宣諭粵西左右兩江及雲南土司  
令各發兵勤王

宿垣所至諭以大義土司無不感激願効復命 遷江西

道御史

封趙榮貴定隨侯駐白水

榮貴以保寧來歸故

以詹天顏巡撫順慶潼綿

以摠兵皮勛守平溪

屬辰州



乙丑清江西提督金聲桓以南昌內附

聲桓與總兵王得仁以南昌等九郡之地來歸詔封聲桓豫國公加太子太傅兼吏兵二部尚書左都御史得仁建武侯其餘大小文武進秩有差聲桓志存匡復每就故閣臣姜曰廣進士萬翱私相深計二人極力贊成各欲以身殉國聲桓志遂決會清撫章于天貪虐上下咨怨且與聲桓有卻時以會宴演劇聲桓曰畢竟衣冠文物好看于天曰如此便當代為疏請聲桓自知失言深自引謝翌日于天遂上疏劾聲桓有反狀而撫吏與督吏兄弟也潛以其事告之聲桓發飛騎

追獲其疏遂與得仁合謀殺于天傳檄江省州縣共圖反正

督師堵胤錫駐申家渡袁宗第駐松滋金家場

二月鳳陽地震

清廣東提督李成棟以肇慶內附

成棟遣洪天擢潘曾緯李綺等齎奏請 駕幸端州

清熹章京線國安遣降將田起鳳攻平溪

總兵吳尚慮率副將三人迎戰三人俱敗死

清攻永寧縣

線國安遣徐爾先等攻永寧寨寨賈溪王嘗灑總兵項登韋

被獲苗兵萬人俱死

初八日崇陽王攻黎平敗于清鎮陳友龍

崇陽王率苗兵十二營攻黎平為清制津鎮陳友龍所敗諸營俱潰降獨興化土司迎奉國將軍暉奎入寨以兵于人守之友龍復破寨暉奎死

十五日鎮江地震

十七日金聲桓率兵攻贛州

十九日清孔有德入全州

廿一日永成伯郝永忠擁兵入桂林

廿二日駕發桂林留守大學士瞿式耜次樟木港激各鎮援  
桂林

清兵薄嚴關駕復南幸鎮將敗逃過省撞塘呼號屠燒邑屋賊殺不辜欲以無禮犯式耜式耜端坐廳事不可動清乘間來窺突騎薄城門式耜率典兵宿將歃血定盟申約束畫則閉門固守夜則銜枚襲殺視丁亥春尤加奮勇西省賴以復全

永忠營被襲疾至關欲撤兵時左右近臣即勸上移桂林式耜以為不可若以走為上策桂可危柳益可危彼今日可到

桂明日可到南太及反復千言淚下且沾衣嚴起恒曰遲至  
厥明式耜脩御用銀三百兩將進而乘輿已發式耜疾出送  
駕數千兵遮之不得行式耜署中冠服束帶箱篋圖書咸被  
掠聞其主將以令箭護式耜署者反擄其署式耜裸坐署中  
持令箭逼登舟或曰無以復主將令乘主將先行而亂之耳  
滇營亦自靈川撤城內煙火高樓櫓城外不可停泊式耜寢  
一小舟家大啟舟三里樟木港黎民司寇遠生給事中時魁  
六吉湘客至先以兵與閩民被殺掠聞上命湘客安撫亂  
亾及勸餉糈出遠生時魁以名將入遇式耜于樟木港遠生

僉謂兵潰倉卒不及瞬息難下手請下朔平間催焦璉入援  
檄遠近無內恐式耜然之舟下三十里至豆豉井式耜入民  
舍集遠生等立草檄分路四發明日仍返桂城下俾知留守  
在也旋驪陽朔璉兵續上援楚鎮周金湯熊兆佐亦入桂城  
式耜命簡討蔡之俊大理寺評事朱盛濂先入桂宣式耜令  
檄按察司僉事邵之燁部璉兵見劉湘  
容紀事  
孫可望請駕幸南寧許之

詔封李成棟惠國公

遣吏部侍郎兼副都御史吳貞毓賫敕入廣東勞成棟封成

棟惠國公并封佟養甲襄平伯

詔督師何騰蛟入守桂林清破興安

時騰蛟自守嚴關遣將守興安及奉詔守桂林清遂破興安  
破岩關傷軍官萬人興安總兵三人及副將叅游以下四百  
人俱死

是月辛卯白虹貫日

三月丙辰朔督輔瞿式耜入守桂林

時太常卿黃太玄斃于兵式耜棺斂之

乙巳駕幸南寧大學士嚴起恒王化澄同入閣辦事起恒攝吏

部尚書以龐天壽掌司禮監

西粵新書云隨駕止嚴起恒馬吉翔科臣吳其雷洪士鵬許

兆進尹三聘大司馬蕭琦七人

贈陳子壯東閣大學士忠烈侯諡文忠予祭塋廕一子中書舍  
人錦衣衛世襲

贈張家玉少保太子太師武英殿大學士吏部尚書增城侯諡  
文烈予祭葬追封三代廕其弟家珍錦衣衛僉事

十三日清兵攻順慶

安南入貢

報李成楫之聘也

十五日大學士嚴起恒請開選邕城受二十四土州貢賦從之  
邕城屬南寧 時陳邦傳守潯柳二州不能供億故有是請  
念二日清攻桂林薄北門督師何騰蛟擊走之騰蛟師攻榕江  
初騰蛟自永寧至桂滇鎮胡一清亦統兵至桂清人尚疑城  
虛直抵桂北門騰蛟督兵三面出追殺三十里清人北渡甘  
崇去督師列營榕江瞿式耜輸餉百石督師出關與留守相  
慰勞

二十三日甘州蘭州兵起

晉荆江伯張先為壁侯

督輔瞿式耜檄諸鎮攻取全州

督輔瞿式耜檄廣西巡撫魯可藻下梧州

可藻銜自署兩廣舊例東撫稱制兼粵西西撫稱撫式耜曰  
方今武人多自署撫軍輒自命貽遠人笑因代疏請改銜  
大學士周鼎瀚罷

當武岡之亂言官彈鼎瀚以附承胤入直式耜司票擬獨不  
可謂鼎瀚既係大臣應聽自謝免

賜督輔 瞿式耜銀幣金圖書

篆曰精忠貫日

清攻潼州綿州

以朱天麟為大學士晏清為吏部尚書張起為戶科給事中張鳳翼以兵科掌翰林院張佐辰掌文選司童雲驤為行人潘駿觀為職方郎中

守制御史顧之後亦隨駕

陳邦傳自請世守粵西督輔瞿式耜奏止之

閏月丙戌朔皇子生冊為太子頒萬喜詔大赦天下  
督輔瞿式耜進八箴

式耜以經筵無講官無由聞得失書八箴於扇進之

十八日荆江侯張先璧克靖州遂克沅州

清沅州道戴國士以沅州來歸先璧題授都御史巡撫偏沅  
召四川巡撫毛芝瑞為吏部左侍郎芝瑞旋卒

初芝瑞留劉承胤謀立武崗芝瑞力折之幾被害走廣東病  
踰年漸劇而所善黃嘉卿知養利州以書迎之遂移居萬年  
城至是行在以吏部右侍郎召之既拜命遽卒

五月乙丑朔日有食之

二十日清陷潼州

二十二日清陷綿州

二十七日督師何騰蛟復全陽

騰蛟奏捷疏歸之留守曰為皇上以信臣用臣者式耜一人也

陳友龍以奉天來歸

清援江西

五月七日清譚泰兵至石頭曰其兵一路從饒州一路從九江一路從進賢並入圍進賢順化二門十七日聲桓等兵自贛州下越二日入城先是聲桓命大廳宋弘宇以兵三萬守

南昌十三日戰敗譚泰兵于鉄綿巷七里街在德勝門外泰兵于

廿三日接戰聲桓敗守德勝章江廣順王德仁守進賢順化

澹臺七月清築長圍二十以後以浮橋柵斷章江

六月甲午朔有流星入于箕尾

督輔瞿式耜勞師全陽

遣刑部侍郎劉遠生入粵東勞師

初成棟表至舉朝歡呼科臣張起靖先遣方正大臣觀其虛實吏部侍郎吳貞毓拜命行使還力言成棟忠誠迎駕初無虛偽因請幸廣遠生秦人久節鉞有威名為成棟所重信式

報請充此選

督輔堵胤錫兵入常德辰沅

清官程時登余必躍逃

清副將馬進忠以兵來歸屯守蘆溪

進忠故流賊號混十萬

官軍復均州

清官李鳴謙走脫清官之守衡永寶慶榔郡者多遁

是月駕發南寧幸潯州

秋七月

晉陳邦傳慶國公留守潯州兼守南寧等郡

駕至潯州適宮眷有疾留數日邦傳以扈從新功擅劄授官  
始于慶國自劄繼而部劄後則御劄亦曰欽劄欽劄與吏兵  
部不相涉其銀則分散兵需及沿途賞賚取足于此

邦傳浙人原任廣西總兵隆武二年掛征蠻將軍印永曆改  
元封思恩侯

慶國公陳邦傳請世守粵西故黔國故事閣臣朱天麟票擬不  
允其請邦傳恚甚令武康伯胡執恭至天麟舟中傳語云勲公  
欲將劍印擲公舟令各營兵聽公發付等語詞甚厲天麟不為



動

佟養甲伏誅

成棟遣養甲代祭典陵密令李

元胤

成棟養子本姓孫

八月

朔駕幸端州

即肇慶

賜惠國公李成棟建元勳府第以

元胤為左都督

式耜面奏駕勿東興陵兩載風塵成棟令地方官備葺陵殿  
巍然天壽展謁畢龍舟宜即返灘灘而上成棟備法駕進御  
用嚴護衛甚威具移山起海之力非有所宜但事權宜專號

令宜一茲軍功爵賞文武置署置決于成棟若歸之朝廷徒  
虛拱且楚黔雄師百萬騰蛟翹首威靈駕既東軍中將帥為  
皇上樂新復之地成棟亦有邀駕之嫌號令既遠則人心  
渙散請上一見東諸俾瞻口天子音容而為慰勞指屬然後  
責其盡意于東刻期出師一切決于外不中擾也式耜先後  
遣簡討蔡之後給事中蒙正發迎駕 上竟由梧入肇式耜  
再疏言前日粵東未復 上宜住桂以視楚今日江廣反正  
則宜住桂以出楚事機所在毫厘千里吏部侍郎吳貞毓請  
上幸廣城式耜乃促遠生入朝遠生見朝後成棟適自欲

還師脩行營迂乘輿興 上命遠生詣廣勞成棟遠生謂成棟曰今乘輿駐北爵賞征伐人疑有私不可不嫌成棟然之遂罷修行宮止遣官迎駕蓋遠生承式耜意欲駕返桂林也召大學士瞿式耜赴行在式耜疏辭

戊戌督輔何騰蛟復衡州永州師次湘潭

庚子復寶慶

張先璧唐姚陳友龍等所復

以袁彭年為都察院左都御史洪天擢為吏部侍郎潘曾緯為大理寺正卿李綺為提學副使

從李元胤薦也

補陳世傑翰林學士吳以連驗封司李貞給事中高賚明御史王應華光祿卿楊邦翰太僕卿唐元楫職方司

從元胤薦也世傑等皆廣人

陞曹燁兵部尚書耿獻忠毛毓祥通政使

從洪天擢薦也

大學士嚴起恒王化澄朱天麟吏部尚書晏清吏部侍郎吳貞毓科臣吳其雷洪士彭雷得復尹三聘許兆進張起等俱赴行在所

副都御史劉湘客禮部侍郎吳璟

即吳文瀛

吏科給事中丁時魁戶

科都給事中蒙正發兵科都給事中金科堡禮科都給事中李

用楫文選司郎中施名徵光祿卿陸世廉太僕卿馬光儀司

徐世儀等皆赴行在所

以上八則見兩粵新書事多未核據劉湘客撰瞿留守傳實

未嘗赴行在

九月癸丑朔有火星自東隕有聲

清陷寶慶

陳友龍復降

冬十月壬午朔惠國公李成棟入朝

成棟五日一朝時政無巨細上悉委之成棟亦必請旨後

行

督輔何騰蛟檄馬進忠李赤心會師取長沙

南雄知府凌屏渠遇害潮州

二十二日清再陷常德

左都督李元胤署吏部尚書

元胤既殺佟養甲于德慶道上威權愈赫會其誕日饋送稱

觴達于佟杪通政疏司疏陳乞官日以干計閣臣票擬只有

着議具奏四字文選雖掌銓衡之權空名而已廣省非從元  
胤轉奉成棟劄咨不得擅為除授桂林平樂則瞿守為政廣  
遠柳州則焦新典為政潯南思泰則陳慶國為政慶國先有  
降表至廣為成棟所鄙承成棟旨咸思擊之

洪雅兵亂

是冬洪雅鎮湯國聘與團練花漢將熊振生治兵相攻洪雅  
之境無寧宇

十一月朔

李成棟請出師南雄與金聲桓合攻贛州

督輔何騰蛟遣兵復安化醴陵益陽湘鄉攸縣

初二日馬進忠李赤心兵至長沙

清大同鎮姜瓖以大同內附

二十六日清吳三桂兵至保寧

永國公曹志建駐永州

十二月朔

李成棟師次南雄

清援長沙李赤心大掠湘潭而遁

三年祀春正月

朔駕在端州

罷大學朱天麟召舊輔黃士俊何吾騶八直

科臣金堡等疏劾陳邦傳邦傳疏請即用堡為監軍以觀臣  
十萬鐵騎十一日大學士朱天麟票擬有金堡從來朕亦未  
悉之語十二日早朝科臣丁時魁等率科道十六人進丹墀  
掛冠而出上不得已賜諭帖于李元胤收回原旨天麟即  
日放還田里金堡丁時魁等仍舊供職時魁等又劾天麟結  
太監王坤求陳邦傳特薦得以入閣又令其長子為御史掌  
河南道次子為中書弟為行人得旨一門盡黜  
十九日清再陷南昌金聲桓敗沒

一作念九日

南昌有湯副總守進賢門獻城王得仁被執死之姜曰廣自  
經

二十一日清再陷湘潭督師定興侯何騰蛟被獲不屈死之馬  
進忠走靖州

諸帥望風奔潰却地數百里省會震撼老幼竄走內外數十  
萬不復舉烟火

清陷衡州

念八日大學士黃士俊何吾騶乞罷許之

嚴起恒王化澄同入閣辦事

詔勅中書張立光崑山張魯傳之子陳邦傳致金珠祈改敕中一字因去秋駕過潯州邦傳留駐月餘李成棟連表亟請駕遂發仍令邦傳居守潯州如瞿相例中書寫敕遂以世字易居字科道疏論立光擬罪

袁彭年求入相不得上疏云儻臣舊臣以三千鉄騎西來今日君臣安在 上持其章示羣臣舉朝大駭

時肇慶有假山五虎圖謂元胤以賈冒李也元胤本姓孫又姓賈五虎者為總憲袁彭年為虎頭 丁時魁為虎尾戶科

蒙正發為虎脚兵科金堡浙人隆武初為延平知府疏激上殺同卿尹文燁施琥二人人畏之號為虎爪副都劉湘客陝西布衣來自瞿相又為成棟同鄉號為虎皮新南粵

二十八日定隨侯趙榮貴戰沒龍安柏峪口隨一作遠

二月 朔張先壁率水陸兵數萬攻辰州不克

初五日清入撫州次日破建昌

初九日樂安縣殺姚大使

二十五日破蠡縣

陷長沙

破嶧縣

晦日賴熊等破廷陽

是月清陷信豐惠國公李成棟歿于陳

正月成棟踰嶺攻贛州適金聲桓戰不利全師退去成棟勢  
單清將高進庫乘機拒戰成棟復不利退至信豐兵潰不可  
制成棟親為斷後乘馬渡河負鉄甲馬不勝水溺成棟遂卒  
時中軍杜永和代領其衆清兵復追敗之兵部侍郎張調鼎  
監軍道姚生文為亂兵所殺

三月

初七日行在得督師何騰蛟惠國公李成棟敗報

方中湘之報陷也羽檄達行在公卿震駭會集政事堂議所  
以代定興侯者僉曰惟留守公望尊德鉅足以折制諸將議  
欲舉大事招討湖南北莫留守公宜奏上 上曰俞惟留守  
式耜作朕柱石朕悉其才是必能為朕任閩外釋北顧憂者  
于是賜式耜彤弓鉄鉞特遣郎官一員捧詔詔式耜從此沅  
湘永寶鄂岳上下三軍之任行間者皆得生殺予奪惟命式  
耜辭不獲乃戒期誓衆建元帥旗鼓申號令親出入行間令  
且環師全永跳盪捷擊刻日可獻俘馘

初八日兵至湘潭

夏四月初三日清再陷寶慶

初五日太白入月

初八日犁虜伯孫守法敗沒于興安

沒于藥箭寨

十四日故科臣沈迅自焚于萊陽

二十六虜破長山

孫可望據雲南自疏求封秦王不允以安東封之可望不受

可望遣龔彝之弟鼎獻南金三千兩名馬四匹求封親王名

號金堡以祖制無有阻之廣西南寧府與滇之廣南府接壤

龔彝乘書有不允即殺出等語陳邦傳大懼即具疏為可望

請封秦王大學士嚴起恒以為不可止封安東王可望因拒

命未幾可望密遣人擊起恒于鄧州之濱幾殆

五月朔以兵部侍郎張同敞總督湖廣軍務

授瞿昌文中書舍人

昌文式耜孫也自海至

督師堵胤錫辭朝旋病卒于潯州

胤錫將滇南過宜章圖入粵東因割據者強觸相凌乃不果



行遂以偏師會曹志建于永明孤軍無援遂為所制兵將瓦  
解胤錫單騎夜遁走間道覲闕至潯陽卒

劉湘客曰胤錫移瞿公書云 上有密勅云東人握君子掌  
一朝不戒生劫入舟朕不復有中土之望唯卿與瞿先生圖  
之瞿公得書大驚知斯語非出上意鹵簿諸臣欲外鎮與東  
諸侯釁則從中可攬權故詭為 上策敕使胤錫聞于諸鎮  
上方蹕東鼓厲征討詎意內外生釁書四年朝事始未致胤  
錫我輩不力視封疆聽人臯牢而啟釁非社稷之福也忠貞  
營勛國公高必正諸勲咸偉其議

六月 朔左都御史袁彭年以憂去

自五月乙亥雨至十六日乙丑大水寒

秋七月 朔遣內侍持策敕獎南雄守將閔可義杜永和

副將楊大甫與李元胤不協先燒營東下南雄卑弱可義斷  
指自誓軍心始固

十四日楊展破遂寧旋潰回嘉州

永州再陷興寧侯何一青退守榕江督輔瞿式耜檄一青出兵  
屯全州

召廷臣集議于慈寧宮發東餉萬兩

八月 朔

初八日以督輔瞿式耜生日遣官賜金幣

八日姜瓖敗没于大同

袁韜武大定等誘殺楊展遂據嘉眉

明年春葛佐明倚九溪之險糾衆與袁武相拒期年始定

是秋清帥尚可喜攻陷潮州

大學士郭之奇禮科都給事中郭朝薦相傳殉節

冬十月贈何騰蛟中湘王李成棟寧夏王金聲桓南昌伯設壇

祭之

大學士王化澄致仕嚴起恒入直

自黃士俊何吾騶去位有疏未拜而先商票擬落旨不符則

與化澄相仇故化澄罷去惟起恒耐之故得獨相

十一月 朔德化王被獲遇害

鄭芝鵬踞石榴城清兵至隨遁去劉中藻在福寧勢窮自縊

福建盡失唯延漳汀三郡界連江西而延平所屬皆處萬山

中清兵既去德化王慈燁踞將軍寨先陷大田繼破龍溪攻

順昌將樂十一月清兵復陷之王被獲兵部尚書羅南生等

降

十六日清入 州巡撫鄭愛陣歿于燕子窩

副將陳勝彭昌高勝談玉等戰于白虎關俱被獲死

十一月

十二日興寧侯何一青率粵兵數萬攻永州不克退入山

曹志建復永州

并復桂陽擒清官李亨

潮州守備郝尚文降清

孫可望大掠貴州殺富順王平鼎

是歲封李建捷安肅伯

建捷北直真定人成棟養子從信豐歸守廣州

四年庚寅春正月駕在端州

清陷南雄屠之閔可義力戰而死杜永和以餘兵守清遠峽

初六日清陷韶州

寶豐伯羅成耀預遁

賜李元胤復姓為孫

上以成棟死難晉元胤車騎將軍封南陽伯元胤力辭 詔

固不許乃勉受車騎印而章疏多不改元銜冬去清以精騎破

南雄韶鎮羅成耀棄城走元胤聲其罪與蒼梧棄督師鎮揚

大用咸伏誅人咸服其紀律時督廣州杜永和退走海外保瓊州

初七日復以王化澄爲大學士

初九駕發端州十三日命李元胤留守

上聞韶鎮羅成耀遁去遂戒舟西上

駕至德慶

二月朔駕至梧州

戎政劉遠主奏自請行守清遠峽給事中金堡奏留駕爭之不得適大學士瞿式耜疏至言粵東難得易失且韶去肇數

百里強弩乘城堅營固守亦可待勤王兵至何乃朝聞警而夕登舟疏再上而蹕移德慶向梧州矣

下給事中丁時魁金堡蒙正發詹事侍郎劉湘客詔獄從御史程源奏也大學士瞿式耜七疏救金堡等時上至梧州百官請修行臺上欲以舟爲家有旨命陳邦傳統兵護駕馬吉翔護三宮舟先行五虎失勢報仇者羣起獨袁彭年以憂去得免時魁等奉旨逮問于梧州昭廠衛故事榜掠招賂以數十萬計畫以充餉拷訊時惟堡大呼二祖列宗餘則乞哀殊甚

十五日清攻奉天總督劉祿監軍御史毛養登戰死馬進忠走靖州

二十六日清攻廣州

清陷惠州

惠州總兵黃應杰道臣李士璉知府林宗京等以惠州降清并執趙王由棧以獻

三月

念四日清破永州鉄柱關次日破龍虎關總兵向明高姚得仁陣歿永國公曹志建奔瀘陽

念八日殊敕發內閣榜袁彭年金堡丁時魁劉湘客蒙正發等罪于朝堂追賊遣戍以昭法紀

夏四月 朔再行考選

朱士焜考選第一常州靖江縣人補吏科給事中以代丁時魁補童

雲驤御史潘駿觀職方主事雲驤謝恩時伏地不能起殞于

御舟

初八日清至黔陽

二十日王光恩駐巫夔間行屯政

清兵至郴州興寧縣巡撫黃順祖總兵林國瑞戰死其衆二千

人被屠

二十四日興國侯李赤心擒永州清官李茂祖余世忠送行在誅之

茂祖陝西布政署巡撫事世忠乃鎮將也

六月朔

清入清遠峽

清遠叅將鄺文龍東莞總兵張道瀛叅將張善南雄副將軍養志等俱降

秋七月朔

湖南巡撫

總兵白文明自榔桂出降于孔有德

八月

十五日御舟泊繫龍洲

在梧州之東

自春至秋王嚴二相隨駕道遙河上有民謠云漢宮秋也昭陽愁也起恒字秋冶化澄字昭陽上與太后三宮置酒樓船簫鼓于梧州繫龍洲之上下起恒手書水殿二字掛小牌于御舟前上飲至中宵不樂而罷以清遠峽及惠莞間有敗報也

九月清破灌陽知縣李遇昇被獲死

曹志建奔恭城

冬十月 朔日有食之

上不怡嚴起恒疏請修省

大學士瞿式耜遣其孫昌文入覲于梧州授昌文翰林院簡討

十一月

駕幸藤縣陳邦傳自潯江迎駕

初一日清陷廣州屠之

李元胤携重貲入廣州城中人亦嬰城自守男子上城婦女

饋餉清兵環圍城外自八月至十一月初二日五鼓北門觀

音山紫雲梯遂入城城中驚惶相蹂踐砲銃相擊城門築塞

難開百萬人民盡死于內杜永和自清遠敗後退還端州尚

有兵萬人知不能守遂奔恩平高電以扼高雷廉 上與太

后三宮移舟西上至藤縣遂分為兩陳邦傳自潯州來迎駕

諸臣與之合者皆往右江不入者則入容縣溝赴北流陸州

高化境兵多散敗肆行劫掠戶部尚書吳貞毓失一妾刑部

尚書毛毓祥了身遁聞 上往南寧向交趾反二十四土州

為援相隨有王化澄嚴起恒馬吉翔龐天壽等陳邦傳尚據

潯江為殿後其兵尚萬餘

初三日清孔有德入全州

衛國公胡一清撤守榕江兵

初四日孔有德犯興安

四日有德兵至興安次日辰刻大舉入巖關開國公趙印選  
衛國公胡一清寧遠伯王永祚俱以分餉入桂榕江空壁武  
陵侯楊國棟寧武伯馬養麟方馳出小路軍榕江兵未戰而  
四清發使趨印選印選已出城城中大亂沿道驅掠式耜令  
戢之不得城中潰兵各鳥獸散一清永祚從城外去式耜衣

冠危坐署中適總督張同敞自靈州回過東江不入 泗水

過江入桂林願與式耜同殉國

初六日孔有德破桂林

劉湘客作初五日用曆異也

清江王及其世子長史李 被獲不屈死

留守大學士瞿式耜兵部侍郎張同敞被執不屈羈于別室

大學士王化澄戶部尚書董天閱廣西布政朱 俱降于清

桂林平樂全州 東安永寧臨桂靈川興安義寧灌陽永福

恭城陽朔荔浦修仁富川平樂昭平等十七州縣俱陷



閏十一月

十七日留守大學士瞿式耜兵部尚書張同敞死之  
劉湘客曰瞿公執去見有德公云事已至此一死足矣夫復  
何言有德雅重公安于別所防衛嚴而不失禮焉公賦詩與  
張公賡和邏卒得公與胡一清書知公死心社稷而志未灰  
也十七日辰刻請公出公笑謂張公曰我二人多活了四十  
日今日事畢矣張公亦謂曰今日得死所矣遂南面被害十  
六日之夕十七日之辰雷霆冬發遠近皆曰徵在公也瞿公  
絕命詩云從容待死與城亾千古忠臣自主

恩澤久頭絲猶帶滿天香時給事中金堡已為僧有德請墜  
二公遂瘞北門園

十二月

駕幸南寧入土州朱天麟嚴起恒王化澄馬吉翔龐天壽等俱  
從行

擢兵科給事中張起為副都御史巡撫南寧

南陽伯孫元胤被獲于欽州赴廣州

五日之內兩廣連陷駕離梧州為陳邦傳所劫百官星散元  
胤身率散卒護蹕南寧身至南海檄舊旅至欽州為土兵

王勝常所劫械送廣州見有德不屈膝有德不遽殺留之以  
招杜永和

是冬高李二將率衆數千渡瀘自黎州出掠嘉眉

五年郊春正月 朔駕在南寧尋幸安隆州

二月十五日清陷梧州及蒼梧藤縣

二十五日清陷柳州及象平馬平

三月

端州羅定州降于清

清陷高州

高州提督李明忠兵潰吁口清兵追至電白縣明忠預遁清  
遂陷高州道臣郭光祖吳人龍知縣文振義副將王邦友等  
俱降清

新泰伯鎮守潮州總兵郝尚文潮州道沈知府王朝鼎俱降于  
清

尚文尋內附

夏五月秦王孫可望遣將賀九儀總兵常榮將兵至南寧護駕  
并請移蹕雲南

上亟召隨從諸臣議之時閣臣吳貞毓御史王光廷徐極等

勸駕幸欽州依李元胤閣臣朱天麟力請幸滇言元胤屢敗之餘衆不滿千棲依海濱其不足恃明矣雲南山川險阻雄師百萬北通川陝南控荆楚亟宜移蹕以堅可望推戴之心以慰中外臣民之望吳貞毓魏光廷等堅執不可遂寢其議秋八月慶國公陳邦傳與其子文水伯陳魯禹遣將至梧州降于孔有德

潯州總兵李時方有聲副總兵鄧景監軍遣楊兆文潯州知府何允中俱降于清

陳邦傳殺宣國公焦璉

璉與邦傳有兒女戚邦傳說降不屈遂為所誘殺又寧端伯茅守憲為邦傳所脇繳印降守憲尋悔恨遂卒

冬十月撫南昌劉文秀率兵五萬攻保寧不克

文秀自滇入蜀與文韜武大定等相拒數月

十四日靖南侯于大海率兵于荊州降于清

大海初據夔州之巫陽為孫可望所敗故降

定川侯季占春被執

占春偽降即為僧遁去尋復被執

是歲永州諸生鄧光遠不屈死之

孫可望殺大學士楊畏知

畏知故衡澹道也永曆改元擢部院是年入覲安隆晉大學士還滇可望忌而殺之

行在陽秋下

六年

壬辰正月

朔駕在安隆州

二月廿五日吳三桂破嘉定州總兵王文選預遁

清杜繼茂兵入欽州開國公趙印選預遁

杜永和守瓊州降清

三月初八日湖北晝晦大風揚沙至持燭而行

官軍復沅州又復平遂衛藍田縣

清破佛圖關遂陷重慶

夏四月廿日清入叙州總兵王俊臣白文選退守永寧

故四川提學任佩弦降于吳三桂

十一日德州雨雹大者如瓜殺三人沉漕舟一

十三日清殺南陽伯孫元胤安肅伯李建捷

元胤聞杜永和之降慟哭三日夜清遂殺之投尸江中時前

鋒將周彩安肅伯李建捷亦成棟養子與元胤義兄弟也建

捷嘗從杜永和先登廣州敗走蒼梧與元胤同護蹕亦隨海

內欽州作難已登州舟出海聞元胤被執遂願與同死

十八日官軍復清州擒斬清總兵楊國勛

念一日孫可望自靖州率衆攻湖南清帥沈永忠遣張國柱禦

戰可望擊敗之

六月荆江侯張先璧朝行在封沅國公

晉馬進忠鄂國公

吳三桂破石泉縣巡撫詹天顏及曹洪等俱被獲

天顏福建人

秋七月庚午朔復寶慶

初四日安西王李定國平東王孫可望復桂林孔有德陳邦傅

曾盛祖祕希孔承先孫龍孫延世董英袁道先等伏誅

可望自行在出寶沅定國帥偏師輕騎扼有德于桂林旬日

下數十城有德自刎已獲其幼子置軍中至十三年己亥春  
殺之

十一日庚辰黃霧四塞

復永州

擒斬清紀國相鄧胤昌姚杰等數十人

八月十六日復夷陵

十八日建極殿大學士朱天麟卒于廣南府予祭塋廕一子中

書舍人謚文靖

孫可望敗清于靖州

可望駐長沙善安縣

博典侯張月降于清

九月清再陷梧州

杜永和張月執提督李明忠降于清

詔授文日華章為攸縣知縣

吳三桂兵至龍安邊堡

冬十月撫南王劉文秀攻保寧不克

文秀自綿州出攻保寧十日吳三桂至文秀撤圍退

十一月十三日官軍復衡州擒清辰州總兵徐勇及劉升祚等

十九日清兵至湘潭馬進忠退守寶慶

二十三日清再陷衡州

總兵馬 敗死

十二月初五日清陷藤縣總兵羅超戰歿再陷賀縣

念九日清兵入平樂縣平彭俊陣歿

是歲封莫宗文安仁伯

七年癸巳春正月 朔駕在安隆州

二月李定國馬進忠兵入永州

念八日永州陷李定國走龍虎關

孫可望駐靖州總兵馮壯力駐奉天

清帥耿繼茂破廉州道臣王道光被執死

道光江西庚午舉人初任雲南太和知縣

三月武陵侯楊國棟安仁伯莫宗文攻常德不克

十七日孫可望禦清兵于周家堡敗回寶慶

安西王李定國敗于肇慶退駐柳州

夏四月郝尚文復以潮州內附斬清知府薛信辰

五月封楊時清征定侯

六月初四日潮陽再陷

閏月初九日安西王李定國出師廣州攻肇慶

念六日總兵周金湯攻復遂溪降其首守將陳琪

秋七月李定國復化州吳川信宜石城定國以施尚義守化州

初九日李定國離肇慶

十三日李定國遣兵入賀縣樂平

念一日李定國率兵二萬攻圍廣西賊不克

定國圍七晝夜清兵自奉天至定國解圍

總兵王之邦卜寧張蓋陣歿于陽朔

叛將趙文貴執四川道孫胤乾至保寧獻于清

孫可望駐奉天

李定國兵擒斬清廣西巡撫王荃可

八月初五日石城遂溪陷

化州陷

九月十四日潮州再陷新太侯郝尚文父子投井死潮州道李

北京被獲死

以王立功內應也尚文一作尚久以功歷陞總兵守潮州清

至以城降附戊歲李成棟內附尚文復正朔詔以為將軍仍

駐潮州李敗復降清為潮州總兵尋加銜管水師中疑不肯



越省城癸巳復奉正朔自稱復明將軍挾諸鄉紳入城盡反  
清所署官屬願從者仍與原銜不願者拘留之唯教官以下  
聽下各邑追印多挾印去空城以待惟龍溪知縣焦某舉城  
歸之至是清以重兵壓之尚文父子投井死一曰自縊死  
冬十月清帥尚可喜陷吳川縣

陳彝典陳其策被殺

十一月二十日清督祖澤遠援鄖陽

十二月十三日清破郴州桂東縣黃蠟潭巡撫朱俊臣陷陣死  
總兵羅念等降

是歲官軍擒斬清廣西右江道叅議金漢蕙樂平知府尹明廷  
廣西副將溫如珍降于清

八年甲午春正月

朔駕在安隆府以吳貞毓為大學士

孫可望駐靖州

三月安西王李定國帥兵入高州張月來歸

夏四月初十日李定國兵至雷廉遣將攻復羅定新興石城電  
白陽江陽春等縣

六月李定國遣將攻梧州不克

官軍擒斬清湖廣湖北道右叅議劉鼎祚辰州知府王仕玘

秋七月遣內臣至廈門島冊封朱成功為延平王

二十六日平遠再陷

冬十月初三日官軍攻圍廣州

十一月詔改安隆州為府改都康萬承安平龍安諸州為府

十二月 朔延平王克復漳州

初六日李定國攻新會縣

十四日清援廣州官軍解圍

十六日李定國攻肇慶不克還廣西

南寧巡撫張起致仕

起與孫可望標將賀九儀不和故也

是歲予大學士吳貞毓自盡殺張鏞十餘人

詔曰朕以眇躬續茲危緒上承 祖宗下臨臣庶閱今八載  
險阻備嘗朝夕焦勞罔有攸濟自武衡肇梧以至邕新播遷  
不定茲冬瀨湍倉卒西巡苗截于前虜迫于後賴秦王嚴兵  
迎扈得以出險定蹕安隆獲有寧字數月間捷音叠至西蜀  
三湘以及八桂游歸版圖憶昔封拜者纍纍若若類皆身圖  
自便任事竟無一人惟秦王力任安攘毘于一人二年以來  
漸有成緒朕實賴之乃有罪臣吳貞毓張鏞張福祿全為國

徐極鄭光元蔡宿趙賡禹周允吉易士佳楊鍾任斗樞朱東  
旦李頎蔣乾昌朱議泉李元開胡士端包藏禍心內外連結  
盜寶矯勅擅行封賞貽禍封疆賴祖宗之靈奸謀發覺隨  
命廷臣審鞠除賜輔臣吳貞毓死外其張鋤張福祿等同謀  
不法蒙蔽朝廷無分首從宜加伏誅朕以頻年患難扈從無  
幾故馭下之法時從寬厚以至奸回自用盜出掖庭朕德不  
明深自刻責此後凡大小臣工各宜洗滌廉法共守以待昇  
平

附孫可望奏為行在諸奸矯敕盜寶擅行封爵大為駭異隨

奉 皇上賜書將諸奸正法仰見乾綱獨攬離炤無私首惡  
吳貞毓張鋤張福祿也為從者徐極蔡宿等也 皇上立寘  
重典以彰國法矣蓋李頎臣弟也勦虜失律法自難寬方責  
圖功以贖前罪而敢盜寶行封是臣議罰諸奸反以為應賞  
矣且臣所部諸將士比年來艱難百戰應賞應罰惟臣得以  
專之故名器宜重早已具疏付楊畏知奏明即畏知之服上  
刑亦以晉中樞旋晉內閣之故原疏其在可復閱也因憶兩  
粵並陷時 駕蹕南陵國步既已窮蹙加之叛爵焚劫于內  
虜首彎弓于外大勢岌岌卒令駝喙潛跡宴然無恙不謂非

賀九義等遵王朝令星馳入衛之力也又憶瀨湍移蹕時危  
同累卵諸奸惡力阻幸黔堅請隨元胤敗死使果幸防城則  
誤主之罪寸磔遂足贖乎茲蹕安龍三年矣纔獲寧宇又起  
風波豈有一防城一元胤可以再陷 聖躬乎臣累世力農  
未叨一命之榮升斗之祿亦非原無位號不能自雄者也沙  
定洲以雲南叛臣滅定洲而有之又非無屯兵難于進攻退  
守者也總緣孤憤激烈冀流留芳名于萬古耳即秦王之寵  
命初意豈能覲此哉故楊畏如之齋奏疏中有云今之奏請  
為聯合恢勦之意原非有意以求封爵也臣關西布衣據彈

丸以供駐蹕願 皇上臥薪嘗膽毋忘瀨湍之危如 皇上  
以安隆僻隅錢糧不敷欲移幸外地唯聽睿斷自當備辦夫  
馬錢糧護送駕行斷不敢阻以蒙要挾之名

前南寧知府顧祖奎卒

祖奎吳江人祝髮為僧卒于肇慶之白雲寺

九年乙卯春正月 朔駕在安隆府

二月孫可望駐貴州以部將朱養恩守南寧

安西王李定國自賓州入南寧

撫南王劉文秀駐川南

三月二十九日昭平陷

屬平樂倪志倫歐光大袁啓秘徐天麟俱降清

夏四月二十六日李定國兵敗于新會

標將王成張士祿嶺西道陸士瑞 道李昇東安知縣羅

大經俱降清

五月二十三日劉文秀馬進忠與武大定等攻常德不克

冬十月蜀鎮胥登榮降于吳三桂

一作胥發榮明年正月降

十年丙春正月 朔駕在安隆府

夏四月安西王李定國迎 駕入雲南

定國兵至 州詭為清兵戰敗孫可望部將關有才之兵遂

奉詔入安隆州執可望家屬以去

六月潯南恩泰俱降清

秋七月義寧伯龍韜駐柳州

韜與李定國為應援旋被獲死

十八日延平王攻福京

九月十九日清入辰州

冬十月夔州巡撫鄧希明總兵張元凱降于吳三桂

希明白獻賊亂後與元凱同屯懸壑開縣入覲安隆授官

十一年丁酉春正月

朔駕駐滇都

進李定國為晉王

秋九月秦王孫可望謀叛移師犯滇晉王李定國蜀王劉文秀奉命討之師次曲靖府十九日戰于交水可望奔潰

念一日叛藩孫可望遣賊將張勝間道襲滇中書科中書舍人朱斗垣遇賊不屈死之

先是可望謀逆其部將白文選將所屬來歸

上嘉之封文

選為鞏昌王遣尚寶司楊楨幹中書朱斗垣賫敕往曲靖軍

中途遇賊兵遂為所害

二十二日晉王李定國班師援滇擊張勝于渾水塘擒之斬于市

保國公王尚禮卒于滇中

以馬吉翔為大學士李國為司禮監

進撫南王劉文秀為蜀王

是年文秀遣總兵王俊臣姚之貞等統兵三萬人攻保寧為吳三桂所敗俊臣之貞俱死喪卒千餘

萬翱彭萬夫李春秀等降于清

翱原任兵部尚書萬夫為某官春秀舉人降于清偏沅巡撫  
素廓字

冬十一月十五日孫可望降于清

可望為定國所敗率家卒數千人請保慶降于清 封可望  
為義王後隨出獵被射死初可望部將桑某者降歸定國故  
可望窮蹙奔降桑某後為清兵獲械 至北京入見桑慷慨  
自若竟釋之

十二月清兵攻雲貴

泗城州土官岑繼祿降清為嚮導引清兵從間道直抵安隆

時晉王李定國守盤江聞報自統精兵三萬人倍道趨戰我  
師敗績

十二年戊戌春正月

朔駕在滇都

二月原任總兵鄧凱朝行在

凱江西吉安人初同楊廷麟劉同升萬元吉龔榮等奉隆武  
正朔起兵江西其父某死國事

夏四月官軍克橫州

秋八月十七日延平王克復台州

授鄧凱為隨扈總兵守大明門

是年冬十月初七日 上遣內臣李崇貴召凱入朝 上曰  
爾忠義老成可即隨護東宮賜銀一百兩賜銀鼎盃一隻

冬十二月十五日 駕離滇都傳幸永昌

新津侯譚宏仁壽侯譚毅總兵譚憲譚大圖俱降于清

文臣方時等同降

鞏昌王白文選以兵二萬人守貴州七星關敗于清

曲靖知府蓋世祿降于清

世祿貴州畢節衛選貢生也

十三年己春正月 朔

初三日清兵入滇都

提督總兵劉之扶許大元總兵王宗臣王有德副將朱文彩  
朱文盛提學道徐心箴光祿寺少卿管雲南分巡洱海道黃  
復生等俱降于清復生仍管洱海道心箴署臨沅道

初四日 駕幸永昌

吳兵已入貴州 上在雲南倉卒聞報羣臣束手無措太僕

寺正卿辜延泰仁壽人請駕即日幸蜀開荒屯練以圖便利

上意未決晉府中書金公社雲南人極言入蜀不利是時文

武臣僚滇人居多皆思保妻子弗欲遷勸 上寢之吳兵分



道前進一從火洪龍元安龍入一自率諸將從烏蒙入上  
聞警卒起行先至永昌

沅江知府那燾起兵戰敗登樓自焚父子夫婦闔門皆殉義  
死

泰安伯竇民望力戰不克死之

時晉王兵駐磨盤嶺先遣大定營泰安伯竇民望領步兵三  
百人前行與吳兵遇民望誓將士為殊死戰自持雙刀殺吳  
騎將數十員騎步兵三十餘人益畏縮欲退是夜民望復謀  
文勝捷擊吳軍將行為小子所洩吳知之別遁得免明日民

望復殊戰死三百人且盡尚存一小子奔吳營降吳詢知民  
望令鎗砲齊發民望受數百鎗彈從脅穿透戰如故持刀潰  
圍走尋上所在行三十里血湧仆地死吳遂整兵前進

晉王李定國退入交趾

閏月十八日 駕幸騰越州二十日遂行以靳統武為護駕總  
兵

其兵即孫可望之衆也念一日統武竄去

二十八日 駕入緬關緬人來迎

二十九日 駕留蠻莫次日遂行

初上在永昌大學士馬吉翔編修貴州塗敷功吏部左侍郎  
四川鄧士廉大理寺正卿齊環沐國公天波左衛將軍四川  
徐鳳翹等二百餘員及家口二十餘人不俟大軍齊發先入  
緬界

是月雅州伯高承恩及諸土司據兵守境

二月朔文武諸臣自騰越齊奔緬境

初四日馬吉翔李國泰棄太后東宮先奔井梗

初五日鞏昌王白文選遣兵至哩哇城迎駕不值而去  
禮部侍郎潘琪卒

十七日清兵入永昌騰越州

十八日駕幸井梗是晚文武諸臣會于御舟前議遣總兵鄧凱  
行人司任國璽使緬馬吉翔止之

吉翔恐二臣先行言其過也

二十八日遣馬雄飛鄔昌琦使緬

緬王請大臣過河相議乃遣二臣惟通事傳說皆神宗時  
事所去敕書彼出神宗敕相對分寸不符疑以為偽出沐  
國公印相對乃信緬因神宗二十二年因亂來滇請救本  
朝不引允遂絕貢

三月

通政司朱蘊金總兵姜承德自縊死總兵潘世榮降于緬

沐國公天波綏寧伯蒲纓晉王總兵王啟隆等集于大樹下  
天波曰緬酋待我日疎可就此處走護勒撤孟良等處為善  
吉翔與李定國有約力阻之十七日陸行者到哩哇對河離  
城五六里而營緬酋疑我圖吳國發兵圍之有被傷者餘各  
星散晉王總兵潘世榮即降于緬通政朱蘊金吉翔等中軍  
姜承德各縊死

夏四月馬吉翔舉錦衣衛丁調元鼎考功司楊生芳使緬國

二十六日大理寺卿徐環卒

安隆所總兵周文隆降于清

文龍自田州遣弁赴肇慶納降

光祿寺少卿盧桂生降于吳三桂授大理府知府

時晉王遣應奇說桂生歸正應奇被執送吳三桂殺之

五月初四日緬王遣官以龍舟迎駕

初五日駕離井梗

初八日緬王羈駕于孟坑城外

地名者梗

緬王接駕見中國男女財帛心利之欲圖害上遂謀奉駕安置孟坑城外四面皆海人不得通初七日駕至哇哇城對河結營初八日進者梗即前陸行者所扎地也構草房十大間上居依然以竹為城每日百餘兵守護初九日緬人進貢上優賜之

相傳緬婦每日貿易如市諸大臣皆短衣洗足混入緬婦貿易據地雜坐談笑緬官乃曰天朝大臣如此規矩安得不亾行人司任國璽請設廠衛

十六日儀制司 朱冲卒

### 江西宗室

以使緬功楊生芳文選司郎中加丁調鼎五級  
敕緬隘官截止追駕官軍

馬吉翔與緬隘官敕一道內云朕已航閩後有一切官兵都與截殺

六月安德侯狄三品執馮獲禮獻于清授杼城侯

三品雲南建昌總兵獲禮已封郡王

二十一日安南臣武公安降于清

武公安官宗國公遣人至雲南獻降表

二十二日延平王舟師克鎮江圍南京旋退入海總兵甘輝等  
死之

高承恩為其弟承裔所殺

部將爭立自相攻擊

清陷馬湖叙州 伯提督總兵陳希賢等降

鄭中郝永思等固守

秋七月清陷成都總兵趙友鄩等降御史龐之永泳主事賀奇

俱繳印降

清遣川南道高毓苔招降原任四川巡撫萬任

八月滇國公沐天波使緬甸入其城

緬俗以八月十五日各蠻來貢欲張大聲勢天波至彼令跪

足以緬臣禮見天波不得已從之歸而泣告于眾曰我故屈

者為保全 皇上計耳禮部楊在行人任國璽各疏劾天波

屈節于緬夸疏留中

上不豫

以患足故

九月緬人進稻穀

緬進稻穀給各窘迫者吉翔據為己物以其所愛者鄧凱不

平于朝內大罵之時有吳承爵者乃吉翔之旗鼓倅什凱于地損一足

光澤王儼鈇大學士郭之琦總兵楊祥被獲不屈死之

時雲南既陷之奇等避入交趾交奇懼縛送廣西被害之奇絕命詩云十載艱虞為主恩居夸避世兩堪論一聲平地氛塵滿幾疊幽山霧雨翻曉澗哀泉添熱血暮烟衰草送歸魂到頭苦節今方盡莫向西風洒淚痕成仁取義憶前賢異代同心着幾鞭血比長弘新化碧魂歸望帝久為鷓鴣曾無尺寸酬高厚唯有孤丹昭簡編萬卷詩書隨一炬千秋霜管俟他

年祥蜀人不識字以忠義自許臨難神色不變望西叩首謝恩危坐就刑觀者無不流涕

命造曆日

從鄧凱請也

冬十月郝承裔以嘉定印眉等州叛降于吳三桂

未幾承裔反正至辛丑年被獲死

蜀鎮寧侯王友進遣官降于吳三桂

安南都統使莫敬耀入貢于清

是冬嘉靖州陷殺被

十四年庚子春正月 駕在孟坑城外

德陽王至濬降于清

至濬初奔交趾與太監王應遴同匿高平境內自安南莫敬

耀後勢益孤危故至濬亦降

三月初一日穎國公楊武叛降于吳三桂

三桂令陽武招降貴州布司政朱企岷藩宗室武靖侯王國璽

兵部侍郎尹三聘編修劉蔭尚寶等楊楨幹知府范春鰲等

六人六人遂繳印降赴北

大學士方端士降于清

禮部司務王應偉卒

秋七月緬人邀滇國公沐天波再入其城不允

緬使曰此番可冠帶而去天波終不允

八月郝承裔以雅州內附

九月晉王李定國出益良與白文選入緬關次日桐泊疏請迎

駕不果

定國迎駕疏內言前後三十餘章不知曾到今與緬王相約

何地交遞而諸臣在內只蓄安樂全不關節出險緬官求救

一道去了外候久無消息乃拔營而去

以湖廣道御史鄔昌琦改陞河道掌六科

從馬吉翔所薦也

授烏撒知府王祖望禮部主客司

祖望晉王藩前人能醫中宮有疾用其藥而愈

太常寺博士鄧居詔疏陳時事

居詔疏為停止不急之務仰祈修省等事內侵吉翔及各員  
自謀自衛等語蓋指行人任國璽欲轉江西道而言也吉翔  
怒奉 旨該衙門知道旨方下而國璽回道及各陞轉 旨  
旋下矣居詔不平即劾國璽國璽亦劾居詔一日 上召面

質不果惟吉翔國泰傳旨云鄧某當好學好免杖

碎國寶以給各員

吉翔奏外有大臣三日不舉火者 上不信次日吉翔國泰  
復合奏 上怒擲皇帝之寶命掌庫太監李國用碎之國用  
叩頭辭不敢又次日吉翔國泰碎之以散給各員 上怒曰  
你們要收門生特把朕作人情耳

十五年辛春正月 駕在孟坑城外

二月吳三桂破馬乃麻衣

龐吉兆吉佐等俱被獲



咸陽侯祈三昇降于吳三桂

三昇與定國不和獨走戶臘三桂遣官招之遂率兵七十餘人涉遠而降孟津伯魏勇總兵劉芝林王有功邵文魁等俱降勇旋病歿

鞏昌王白文選賚奏迎駕

念八日白文選遣緬民賚奏至云不敢速進者恐為所害必令彼送出為上策璽書答之曰不五六日離本處止有六七十里已搭浮橋來矣數日後緬兵斷浮橋而去吉翔國泰挾駕自重不思出險或欲暗相糾結擁東宮因殺吉翔國泰奪

路而出即為吉翔國泰所覺密奏其結盟投緬旨命錦衣衛搜獲為首者殺之

夏四月郝承裔被獲死

御前總兵馬寶降于吳三桂

五月朔大學士馬吉翔司禮監李國泰入宮講書賜之坐

江西道御史任國璽奏為時事三不可解謂上年本請開講期年不行今勢如累卵不思出險尚然如此講書必須科道侍班議軍務則有沐勳臣王皇親等豈翔泰之獨君也言詞切直次日旨下着任國璽獻出險策國璽奏能主入緬者必

能主乎出緬今日事勢至此乃郅肩于建言之人乎時王祖望鄧居詔各疏劾翔泰有內官曰爾上千本萬本亦何用其擅權若此禮部楊在講書賜之坐典璽李崇貴以為非禮次日亦賜崇貴坐崇貴辭曰今雖亂世禮不可廢每講崇貴出外一日東宮問楊在曰哀公何名在不能對

初五日瑞昌王薨于緬甸州

二十二日緬酋莽猛白弑其兄

先是御前總兵馬寶降于吳三桂即使為間至緬王備言吳三桂所以遣之故且曰苟能送帝出則富貴可立至也緬酋

于是令寶至孟坑居上左右上以寶為舊城弗之疑也緬酋既受三桂命遂決計出獻其親兄知之謂曰不可因人之危而為之利不義且彼兵至也天之所立中土之所戴我不能助而反為之害是逆天也逆天不祥不如且全之任彼後圖緬酋即縛其兄弑之

六月十八日緬酋偽請盟馬吉翔李國泰等從之

緬使來去云我王初立怕你們立心不好請去吃咒水等衆你衆人走動好去作生意不然日用亦難云

十九日緬酋殺我文武官僚三十餘人

吉翔國秦聽信緬酋之謀不論大小官員俱携去與緬酋盟  
已刻緬酋以兵三千圍所扎處乃曰爾等大漢可出來吃咒  
水一箇不出來即亂鎗殺死諸臣良久乃出出俱被執而死  
松滋王已下馬吉翔馬雄飛蒲纓鄧士廉鄧居詔楊在鄔昌  
琦任國璽王祖望裴廷謨楊士芳學錄藩璜郭璘典簿齊應  
選總兵王自全安朝位陳謙龔勳吳承爵張宗位錦衣衛大  
堂任子信張拱極劉相來宗宰劉廣銀宋國柱丁調鼎司禮  
監李國泰東筆李茂芳楊宗華李崇貴又周某盧某曹某沈  
某俱失名

馮韋黔國公沐天波署緬僧進食

黔國公沐天波靖來將軍魏豹總兵王啟隆等俱遇害

上與中官將自縊鄧凱勸之曰 太后年老將誰為依 上  
乃止緬兵入宮搜取財幣貴人宮女及各官妻孥自縊者甚  
衆 上與太后等二十五人俱聚于一小房經險二時忽通  
事引守護緬官至乃喝曰不可害皇上與沐國公彼時尸橫  
遍地緬官請 上移出沐國公房內大小二百四十餘人恰  
住一樓母子啼哭聲聞里外閱三日幸有緬僧私進飯食且  
悲哀不已乃知早去各臣悉被殺時有沐天波王昇魏豹王

啟隆各傷緬兵數人而死有皇親家小子名來安年甫十三兵擒之乃曰有銀與你抵腰假作取銀乃拔小刀刺傷緬兵而死

吉王自縊薨

吉王同妃入宮自縊皇親標下總兵姚文相黃華字熊惟寶馬某秦某錦衣衛趙明鋒王大維王國相吳承胤朱文魁鄭文遠李既白凌雲尹襄朱議添千戶吳某百戶嚴某內官陳德遠劉楊二貴人松滋王妃皇親任國璽姜承德妻楊氏俱于十九日自縊死 又起陸諸人先後遇害者通政司朱蘊

金姜承德藩世榮面鼎忠范存禮温如珍副總兵高陞李勝武崗用岷王馬九功王皇親標下劉典隆戴某張某陶某內府劉九臯劉衡汪國泰段能忠謝安祚

施氏曰緬酋既弑其兄遂以次殺上左右從官盡收其妻子晉王聞報即日棄家口親率驍騎疾馳至緬迎駕緬堅閉弗與設兵守城晉王兵不得入遂下令環城數里百計攻擊三日不下城內從官殺且盡惟沐天波未死緬酋將天波至城上木板鋸解以示城外 上遣人登城遥諭曰事已不可為矣從朕文武各官俱已見害城上所鋸解者即沐上公也朕

亦萬無生理可致謝晉王各自為計否則城外當有變矣王  
及諸將士皆下馬羅拜大呼痛哭聲振天地 上遙聞亦哭  
次日晉王憤恨悲號遂大勦孟坑城外雞犬不留而去自是  
人心無主兵多散去

秋七月緬人貢物

念一日緬人乃修原所請衆人安住貢米銅器等物念五日  
又進獻鋪蓋銀布等物甚厚乃曰我王子寔無他意因爾各  
營在外殺害地方遂恨入骨乃衆民所為也

上不豫

冬十一月初八日吳三桂兵至木邦

白文選遣副將馮國恩至木邦偵之中伏被獲國恩遂降于  
三桂為嚮道

十八日 上召摠兵鄧凱入宮

是日午刻召凱入宮諭曰 太后病矣而賊信又急為之奈  
何白文選朕欲封他為親王馬寶欲封他為郡王

吳三桂兵至錫波白文選奔茶山

二十日三桂發兵追文選于茶山

二十四日吳三桂入緬甸境

初三桂在騰越宋腮兩遣人通緬酋使送駕出降否則加兵  
緬酋益決計謀逆

十二月 朔吳三桂兵駐舊晚坡

舊晚坡在緬城之東是日緬相錫真持貝葉緬文降于三桂  
其文有願送駕出城但祈來兵退扎錫坡猶慮三桂之襲其  
城也

初三日緬酋內叛挾 上及 皇太后皇后皇太子公主如舊

縣坡緬酋殺華亭侯王維恭

是日未刻二三緬官來見曰此地不便請移別所爾門兵將

近我城我處發兵必由此過恐為驚動言未畢數蠻子將

上連杙子擡去 太后等悲聲震天行至二百步乃有轎三

乘至 太后等上轎大小男女毫未收帶步行約五里渡河

到岸暗黑不識何兵二更到營始知為吳三桂矣初四日歸

老營初五日曉鄧凱匍匐 上帳前曰今日事至此 皇上

當行一烈使老臣得其死所 上曰固然有太后在且洪某

吳某世受我家恩未必毒及我母子初六日拔老營復轉啞

哇欲攻緬城未遂初九日長發還淇一路大小俱與馬匹進

御膳用金碗不用銀碗 上與東宮俱進解鮮服鋪蓋內官

宮女各官妻妾均與衣被

吳三桂以車駕還南

施氏曰吳三桂兵亦出境將入緬路遇鞏昌王白文選是時文選兵尚強因山路窮僻斥堠不通猝遇無計不敢戰遂降自是三桂無所忌憚矣緬恐遂令馬寶誘上曰晉王兵去此未遠臣欲從間道奉駕奔其軍上從之緬使人從上所至則吳軍矣

十六年

壬寅春正月十三日駕還滇都

三桂日進膳服等物俱倍前

夏四月 太皇太后王氏不食崩

三桂令人奉 上居滇故都督府第嚴兵防守八旗兵皆集

上屢欲見三桂三桂不肯見 皇太后不食 日遂崩

原任戶部尚書龔彝死之

彝永州人天啟乙丑進士也具酒餼進謁 上所守者不許

彝厲聲曰此吾君也我為其臣君臣之義南北皆然我祇一見耳何拒我為守者往啟三桂三桂許之彝遂入堂上設宴請 上出朝禮畢進酒 上稍謝痛哭不能飲彝伏地痛哭亦不能起再勸 上飲 上勉飲三爵彝再拜不止遂觸地

而死 上撫之慟幾仆

上崩 皇太子遇害

施氏曰從官扶 上進八旗諸將士皆望而呼萬歲曰此真主也我等雖有主今知其安在不如奉此以成不世之功事將成滿漢諸大臣皆割辮而起為下所洩三桂知之大驚即令輦 上及皇太子出以弓弦絞于市時太子年十二臨難大罵曰賊我朝何負于汝我父子何仇于汝乃至此耶是日天大昏黑風霾並作人影不見 上既遇害三桂使人炙尸揚灰傳賜諸將前所謀奉上八旗諸將士共二千餘人

皆殺之令沒其妻子

襍錄曰吳三桂標將有商于吳者問以舊晚坡之事據云十  
二月初二日三桂至舊晚坡檄緬送駕緬亦遣人相聞薄暮  
緬人送人首十七至三桂營營中訛言駕崩及三鼓謹言駕  
至矣隨衆出迎見二艘渡江來一為 上及 太后 中宮  
東宮公主一為遇害諸臣家屬有緬相及蠻兵二百餘人俱  
至三桂送 上及宮眷于公所 上南面坐達旦三桂標下  
各官相繼入見或拜或叩首而退少頃三桂進見初甚倨傲  
見 上長揖 上問為誰三桂噤不敢對再問之遂伏地不



能起及問之數至始稱名應詔 上切責良久三桂緘口伏  
地若死人 曰今亦已矣朕本北京人欲還見十二陵

死死爾能任之乎對曰臣能任之 上令之去三桂伏不能  
起左右挾之出則色如死灰汗浹背自後不復敢見

吳三桂以總兵鄧凱隸滿洲鑲黃旗不受為僧去

秋七月吳三桂遣藩下蝦護送 皇后公主至北京奉 旨命

禮部養贍于別室仍撥宮女二人奉侍

是月二十九日晉王李定國薨于景線

定國薨後以世子嗣典記靳統武統武奉嗣典為晉王有馬

斯良者定國之表弟心忌統武遂勸嗣典降于三桂

附記壬寅隨駕回滇諸人

吳師相炳一子一女同妾子名宏猷南京人 鄔昌琦一子

三歲豹魏一子宗臯南京人 姜承德三子北京人 丁調

鼎二子 趙明鑑一子一僕 黎應祥千戶廣東人 王祖

望小子新兒 鄧居詔家丁鄧玉前府都督康晉生一子

總兵鄧凱 昌李君調云緬酋送駕舊晚坡在庚子十

二月而龍駒駕崩 皇太子遇害則辛丑三月十八日也君

時在三桂營 曰學者此云壬寅 不何據

行在陽秋終



